

SERAMAI 20 mahasiswa tahun empat Pengajian Akidah dan Agama (Perwadah), Universiti Sains Islam Malaysia (USIM), Nilai, tampil menyantuni golongan kurang bernasib baik di Marawi, Filipina melalui program 'Kembara GISO Filipina' selama lapan hari, baru-baru ini.

Matlamat 'Kembara GISO Filipina' adalah memberi khidmat masyarakat di peringkat antarabangsa, seterusnya menjadi mahasiswa yang prihatin dengan kebajikan masyarakat Islam di seluruh dunia.

Menurut Ketua Kembara GISO Filipina, Muhamad Zakwan Bakar, kesemua peserta program juga mengambil peluang mengenali

budaya masyarakat tempatan serta mengeratkan hubungan silaturrahim di antara umat Islam Malaysia dan Filipina.

"Menyelusuri kisah-kisah penderitaan rakyat di Rohingya, Syria, Palestin dan lain-lain begitu menyentap hati peserta. Hampir setiap hari di dada akhbar dan media massa memaparkan isu kemasyarakatan global yang penuh menyayat hati.

"Tiada siapa yang mampu memecakkan telinga dan terus membutakan mata ke atas apa yang telah menimpa saudara seakidah ini. Berat mata memandang kesengsaraan mereka, namun berat lagi bahu yang memikul bebanan

kesengsaraan yang melanda," katanya.

Katanya, penduduk di sini turut berdepan dengan masalah catuan air dan bekalan elektrik yang sering terputus.

"Malah, struktur bangunan sekolah dan madrasah tahfiz juga semakin uzur," ujarnya.

Misi program kali ini turut berkongsi ilmu tentang peranan masjid di Malaysia yang disampaikan oleh salah seorang peserta, Muhammad Saiful Azim.

Kata Muhamad Zakwan, amat jelas sekali pegangan akidah masyarakat Islam di Marawi masih utuh dengan berdirinya madrasah tahfiz yang melahirkan ramai permata-permata yang

hafaz 30 juzuk al-Quran.

Selain itu, peserta Kembara GISO Filipina turut menyampaikan sumbangan material untuk memenuhi keperluan ibadah masyarakat muslim seperti sumbangan al-Quran dan sejadah serta dua ekor lembu untuk kenduri bersama penduduk kampung.

Jelasnya, mahasiswa Pengajian Akidah dan Agama, USIM serta semua yang terlibat secara langsung atau tidak langsung menaruh harapan besar agar segala usaha ini mendapat sokongan dan diterima oleh semua golongan masyarakat di luar sana malah akan diteruskan oleh generasi seterusnya. - **DHIYAZULHILMI DAUD**



Kembara akidah USIM ke Marawi, Filipina